

www.BibleForChildren.org

Otnga Mugaeai 3



Idio ta eaba iuato iadaoa Eva,
ngansa muriai ei iuot panua
matad bibita toa ngada ne tnad.



Maron Deo ikado gid masilau tibur
aea toa ngada ne ga tiuot, be eta
ngan gid ele oatainga kapei ngan
kadonga parumrumnga mambe mota
mao. Idio ta mota ibeta taine bedane,
"Tautaunga Deo iaoa ikarara gimi ngan
eannya abei itautau toa ngada ne
dadangai na?"



Ta taine ikeo pan mota bedane, "Mao. Deo ilongo ngan gai aean abei itautau toa ngada ne dadangai. Be iaoa ikarara gai ngan abei kelede mon imadmadid rabu ngan dadanga. Deo ikeo ga gai aean mao ga akisi mao pade, ngan kado ta amate."



Be mota ikeo pan
taine, "Irangrang
ngan gimi amate mao.
Ngansa Deo iuatai,
oangga gimirua aean abei
toa ne itautau, eine matami
ga iualai ta aot mambe ei,
ta aoatai ngan danga
kemikemi ga danga
papaeamao."



Io, taine igera abei toa oa itautau imata kemi ngan eaneannga ta ingale. Ta ikeo iloleai bedane, "Kemi ngan naean abei toa ne itautau ta nabada oatainga kemikemi imata ede ga ede." Tota ibada ta ian. Be ibada ilia ga ila pan iadaoa toa imamado toman ngan ei, ta ei pade ian.



Io, tota gisirua matad iualai ta
tiuatai mambe tibangabanga.
Tota tilolodi abei fik ilaun ta
tipit ga iman ad malo.





Be Maron Deo ibaba ga ila pan eaba toa oa ta ikeo, "Eao sida?" Ta ikoli ele posanga bedane, "Gau nalongo eao lalala dadanga iloleai, ta namataud ga namumul, ngansa gau nabangabanga."





"Ta Deo ibeta ei, "Sai ikeo pago
ngan eao bangabanga? Kado eao ean
abei itautau toa aoag ikarara go ngan."



Ta eaba toa oa ikeo, "Taine toa eao bada pagau ne, ei ibada abei itautau toa ne pagau ta naean." Ta Maron Deo ibeta taine bedane, "Eao lem kadonga toa ne madongan?" Ta taine ikeo, "Mota ipakaka gau ta naean."





Tota Maron Deo isere ei ga
iadaoa ngan dadanga Iden,
ta isula ei ga ila ikado
naurata ngan tano
toa Deo ikado ei
ga iuot ngan.






Io, isere gisirua ga kus ta idol gid
kerubim ta timariala ngan dadanga
Iden ngan ado ele parangai. Be
toa eoa idol didi kapei
paraunga aea
pade.



Idio ta eaba toa oa ieno toman ngan iadaoa Eva, ta iapa ta ipopo gergeu aranga. Ta Eva ikeo, "Maron ilua gau ta nabada gergeu aranga." Ta iuato ieda Kain. Ga kus ta ipopo itar kakau Abel pade. Idio ta gisirua tidae kapeipei ta tikakado led naurata. Abel imariala ngan sipsip, be Kain ikakado dadanga.




Idio ga muriai, ta gisirua tikado led tenainga ga ila pan Maron. Kain itenai ele annga edengada dadanga aea. Be Abel ipamate ele sipsip lautabtabe edengada toa luad kapepei ta timan ele tenainga.



Maron itin igelgel ngan Abel ga ele tenainga.
Be itin igelgel ngan Kain ga ele tenainga mao.
Tota Kain ilolo bake ta imata
imirmirianga.



Idio ta Kain ikeo pan itar kakau Abel ngan gisirua
tila tiburiai. Gisirua tilalala tiburiai, be Kain irau
itar kakau Abel ga imate.



Ta Maron ibeta Kain bedane, "Tadim kakau Abel sida?" Ta ikeo, "Gau naoatai mao. Ikamado? Eine gau leg naurata ngan matag ikikisi tadig kakau?" Idio ta Kain itnan Maron ta ilalala ga ila. Ga kus ta ila imado ngan tibur ede ieda Nod toa ado ele parangai ngan dadanga Iden.




Idio ta Adam ieno toman ngan iadaoa pade,
ta ipopo gergeu aranga. Ta iadaoa ikeo,
"Deo ibada gergeu ede pade ga inam pagau
ngan badanga Abel imul. Ngansa Kain irau
ei ga imate." Tota iuato ieda Set.



Adam iadaoa ipopo Set ga kus ta Adam imamado
irangrang ngan rai buno lima buno tol (800). Be
ele gergeu arangaranga ga taine padengada.
Adam aea rai toa ngada oa iuot buno lima
buno pange sangaul tol (930), ga kus
ta imate.



Be Maron igera kadonga sasat togid panua
ngan tibur toa ngada oa iuot paeamao
tau. Somisomi ado ga ado matad nanan
danga papaeamao ga led kimnga
papaeamao mon. Tota Maron ikeo,
"Gau ga napamukuru
gid panua




tanoelai toa
mugaeai nakado
gid ga tiuot."



“Eine ga napamukuru gid eababa ga masilau
kapepei ga gereirei ga gid man. Eine
ngansa mugaeai nakado gid ga tiuot,
be labone napul lolog ta nakeo ga
kemi oangga nakado gid
ga tiuot mao.”



Be Maron ilolo marum ngan Noa.
Noa ele gergeu tol, Siem ga
Am ga Iapet.



Ngansa Deo ilolo ikim tau panua toa
ngada ne tanoesai, ta ilongean Inat toa
kelede oa, ta oangga sai ilolo matua
ngan ei, eine ga irangrang ngan
iduaea mao. Be ei ga ibada
madonga kemi somisomi
ga ilalala
ga ila.



Rom 3:23

Ngansa panua toa ngada ne tikado kadonga sat, ta tisapir ngan madonga kemi toa Deo ele tarangai.

Rom 6:23

Ngansa kadonga sasat aea kolinga ila pagimi eine matenga. Be Deo ele tenainga ila pagimi eine madonga kemi somisomi ga ilalala ga ila. Tenainga toa ne inam pagita ngan leda lupnga toman ngan Iesus Kristus ada Maron.

Ibru 9:27

Panua toa ngada ne manta timate pakelede, ga kus ta tila timadid ngan posanga toa Deo imatai.



Epesus 2:8,9

Ngansa ngan ele kadonga lolo marum aea kekelen, Deo ibada gimi mulian. Gimi akado danga eta ngan luanga gimi mulian mao, be Deo ibada gimi mulian mambe ele tenainga ila pagimi. Lemi kadonga lolo matua aea eine mambe edap tenainga toa ne ila pagimi ngan. Kadonga toa ne iuot ngan gimi lemi naurata mao. Deo kekelen ikado, ta irangrang ngan eaba eta iparim ngan ei mulian mao.

Rom 10:9,10

Posanga toa ne ga bedane: Oangga eao posa masaeai ngan aoam ta keo ga, "Iesus ei Maron," ga eao lolom matua mambe Deo ipei ei mulian ngan ele matenga, eine ga Deo ibada go mulian. Ngansa kadonga lolo matua aea ienono lolodai, ta kadonga toa ne ikado ga taot tutui Deo imatai. Be ngan aada, taposa masaeai toa bedaoa, ta Deo ibada gita mulian.



Ioanes 3:16,17

"Ngansa Deo ilolo ikim tau panua toa ngada ne tanoesai, tailongean Inat toa keledede oa, ta oangga sai ilolo matua ngan ei, eine ga irangrang ngan iduaea mao. Be ei ga ibada madonga kemi somisomi ga ilalala ga ila. Ngansa Deo isula Inat ga inam tanoesai ngan panasnga gid panua mao. Be isula ei ga inam ngan badanga gid mulian.

1 Ioanes 5:11-13

Be posanga toa Deo ikado ne, eine ga bedane: Deo ibada madonga kemi somisomi aea pagita. Be madonga kemi toa ne inam pan Inat. Eaba sai toa ibada Deo Inat, ei ibada madonga kemi toa ne. Be eaba sai toa ibada Deo Inat mao, ei ibada madonga kemi toa ne mao. Gau nabode gid posanga toa ne ga ila pagimi panua toa lolomi matua ngan Deo Inat ieda, ngansa nakim aoatai kemi mambe gimi abada madonga kemi somisomi ga ilalala ga ila.



Otnga Mugaesai 3 - 6

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: M. Maillot; Tammy S.

Bariai Bible (bch) © 2012, Wycliffe Bible Translators,
Inc. All rights reserved.

<https://live.bible.is/bible/BCHWBT/GEN/1>

©2024 Bible for Children, Inc.

www.M1914.org

www.bibleforchildren.org

